

Darogapathar nung Jenangsanger Telongjem Ki semzük



Darogapathar, Dimapur nung September 22, 2023 nü Goa, Maharashtra aser Odisha indang former Governor aser former Nagaland Chief Minister, Dr. S.C. Jamir-i Jenangsanger Telongjem ki semzüksüba mapang tangokba noksa ka yangi angur.

Dimapur, Rongjui/Sept. 22 (TYO): Jenangsanger Telongjem ki semzükba sentong ka September 22, 2023 nü Block-C, Darogapathar, Dimapur nung anepdang 9:00 ako nungi agia liasü.

Iba ki ya Goa, Maharashtra, aser Odisha indang former Governor aser former Nagaland Chief Minister, Dr. S.C. Jamir-i semzükja liasü.

Sentong nung Ki Lapoktsür O jembidang, India nung ita

atongdang yimsüing nung pei tuluba shisanga alitsü mapang masü, ta Dr. S.C. Jamir-i ashi. Aikati tang tashi onok tama aru, nenok tesü aru ta jembir, aser iba tangatetba aliba ajanga nüburtem mainer aser alima merenloker, ta pai ashi.

Lungjemba agi nokdaker aser bensaba agi laor, aser asenok lungjemba agi tanü iba ki nokdaka lir. Anungji iba tanülaji mesamadaktsüi alitsüla, ta Dr. S.C. Jamir-i

ashi. Dangari teka matenbaji tepela agi masü saka luja matener ta angatetsüla, ta ashi.

Dangar koma aor, koda inyaktsü, itemji memeteti yimdak sa bolutepa kazüra, asenok temoatsü mangutsü. Obala nung temi koba lenmang tajung sayu, iba lenmang nung jajang, ta pai ayongzük.

(Maneni tapak 8 nung...)

Watsü Mungdang-i ayongzuka teka mapa balala sayuba sentong ka tenzükogo



Watsü Mungdang-i ayongzükba Pottery & Bamboo Craft workshop sentong nung shisalen sayurtem den tangazükertem aser Watsü Mungdang nungi ketdangsürtem noksa nung angur. Mokokchung, 22nd September, 2023.

Mokokchung, Sept. 22, 2023 (TYO): Ali po (pottery) aser au agi teka mapa balala inyakba (bamboo craft) sayu sentong ka Sept 22 nungi tenzuka yangi Women Resource Centre, Marepkong Ward, Mokokchung nung kadaki. Iba sentong ya Watsü Mungdang-i tentetba School of Culture-i ayongzuka akar.

Iba mapatong ya tongtibangsa Aori benshiba sobaliba tajung aika sama-a aor, anungji, itemji kümzuka aser wazuka ayutsü nükjidong tulu yur tanü nungi iba sentong ya tenzük, ta Watsü Mungdang tir, S. Arenla Longkumer-i metetdaksü.

Sobaliba ta asüdjangji oshi, sobusolem, libaliru, chiyungtsü,

yar tsüingsang, kentenmenü, otsüolem, saisapong, teka mapa/sütakmentak, aluyimba mapa, kaketkeno, jayajako aser ano aika sentaka lir. Item sobaliba ajanga dang kin ka shisangren (identity) jangjar aser item sobalibatemi tarutsü lanu putu asoshi wazuka ayutsü nungdak ta ajiteta, 2021 küm Watsü Mungdang lokti senden akaba mapang 'Sobaliba Riju' ta sür mapatong ka tenzüksü bangzünga ayu, ta lai ashi.

Iba mapatong achayangtsü atema luden ka shimteta yutsü aser item luden ajanga tensa den apet sentongren balala ayongzuka aotsü aser tanü ya mapatong tetenzük lir, ta laisa shisem.

Ibai kuli küptok mapa ka

ama masü aser tenzükpeter toktsütsüba masü, saka ibai teti asoshi aser iba mapatong ajanga nisung karbo pei taküm nung tajangzük ngutetsüsa teimla lir. Iba mapa ya tongtibang saka wadang ulura, anungji, ibai arok khuret ta angateta ajaki iba mapatong takok angutsü shilem agidaktsünür, ta Watsü Mungdang tir-isa ayongzük.

Ali po (pottery) yangluba nung shisalen sayurji - Changki yim nungi Tiamongla aser Jakjemlemla na lir aser Mopungchuket nung Guru S. Pangyang Ozüküm-i au mapa (bamboo craft) inyaksangshi tapu balala sayudar. Iba sentong ya Sept 23, 2023 tashi akatsü.

Teach Tool amshiba nung Nagaland ya state tanabuba lir

Dimapur, Rongjui/Sept. 22 (TYO): Classroom telung nung shisaliok tajung sayuba yimyatem angatetsü asoshi Teach Tool ya World Bank ajanga yangluba hadir ka lir.

NEP-The Lighthouse (NECTAR) Project kübok Leadership for Equity (LFE) ya technical agency ka ama lir aser Teach Tool mapa kuma amshitsü asoshi Department of School Education aser World

Bank yarir. Teach Tool indang 'baseline observations data' ya amshia ano maneni state nung tesayurtem asoshi angazüksü maongka agütsür.

Nagaland Education Project-The Lighthouse (NECTAR), Department of School Education kübok Teach Tool amshitsü asoshi anogo ter training of master trainers (Trainers of Teachers) sentong Mount Tabor

Retreat Centre, Kohima nung September 13 nü tenzükogo. Classroom nung tesayur aser kaketshir tsüingta tesendaktep asadangtsü mechi iba training ya agütsür.

Teach Tool amshitsü asoshi district 16 prong nungi observer 400-500 shi nem training agütsütsü aser tarutsü nung parnoki danga tesayurtem nem shisa agütsütsü.

(Maneni tapak 8 nung...)

Kohima nung IDAN ajanga Bloom Bazaar amenoktsü

Kohima, Rongjui/Sept. 22 (TYO): The Heritage, Kohima nung September 29, 2023 nü Investment & Development Authority of Nagaland (IDAN) ajanga Bloom Bazaar amenoktsü.

Entrepreneurship anitetsü aser local businesses atema sapang balala agütsütsü nükjidong nung iba Bloom Bazaar ya amenoktsü. Nagaland tesem balala nung entrepreneurs tem ajungmesotsü aser parnok nem tashi agüja parnoki yanglutetba osettsüset sayutsü asoshi shishilempaba tesem yanglutsütsüsa iba sentong ya yanglu.

Iba bazaar ya Hokulbar aser Honibar anogotem lapoktsü. Bloom Bazaar ya local entrepreneurs talisa Nagaland nung naro anepalurtem asoshi lir. Iba Bloom Bazaar nungya local entrepreneurs temi sen 500 agütsür stall ka agitettsü aser iba sen ya ananü (Hokulbar aser Honibar) atema lir.

Bloom Bazaar ya naro atema kisüing masü, yangji Naga nung sempet aser businesses adenshitsu. Naro anepalurtem den külemi entrepreneurs aser adener temi Naga nung chiyongtsü, Nagaland nung yangluba products, art, fashion den Naga nung sempet tajung aliba kentener tem nungi ken atenba angashitsu.

Iba ya ajanga Nagaland nung rongsenketzüng aser entrepreneurship nung aintsü aser nüburtemi Naga nung sobaliba aser sempet tali jangjatsü.

Iba bazaar nung shilem agitsü jangra aliba local entrepreneurs temi Bloom Bazaar nung stall mekatsü asoshi +91-8415034311 nung tongteprateptsü akok. IDAN ajanga nüburtem dang iba Bloom Bazaar nung shilem agitsü ayongzük.

Iba bazaar nungya kaketshir inyakyim balala, tanurtem kazüdak tesem aser film screening alitsü.

Mon jila nung medical camp ka ayongzük



Dimapur, Rongjui/Sept. 22 (TYO): Swachhata Pakhwada cleanliness campaign nung shilem ka ama Mon Town Council ajanga September 22, 2023 nü Council Hall, Mon Town nung Chief Medical Officer, Mon aser Hans Foundation den lungjemer medical camp ka ayongzuka liasü.

Medical team ya CMO aser Dy. CMO lenisüba kübok Medical Officer kati anir liasü.

Iba den külemi Hans Foundation ajanga shirangr

anepalutsü temang reprangtsü asoshi facility amenoka sugar level, liver function, kidney function, serum electrolytes aser danga tashidaktem Mobile Medical Unit indang Accuster Lab Machine amshia repranga liasü.

Hans Foundation ya medical practitioner kati anir liasü, aser pa den laboratory technician ana, pharmacist ana aser nurse ka liasü.

Iba camp nung nisung 85 angati temang repranga liasü.

Election Duty mapang amshiba gari taa meshitsu metetdaksür

Dimapur, Rongjui/Sept. 22 (TYO): Deputy Commissioner & District Election Officer, Chümoukedima, Abhinav Shivam, IAS ajanga sangdong ka nung ashiba agi, Nagaland State Legislative Assembly Election 2023 mapang Ghaspani-I aser Ghaspani-II

Assembly Constituency tem nung amshiba Maruti Alto, Maruti Wagon R aser Maruti

Eeco garitem taa September 26 & 27, 2023 anogotem EAC Seithekema office nung anepdang 10:30 ako nungi agütsütsü.

Anungji gari kibur/driver temi Vehicle Requisition Order (Original) bener shia aliba office tonga arua arutsü metetdaksür, ta ashi.

Maneni gari danga amshiba asoshi taa agütsütsü anogotem yaser sangdongtsü, ta ashi.

Niuland DPDB senden September 26 nü amentsü

Dimapur, Rongjui/Sept. 22 (TYO): Niuland District Planning & Development Board (DPDB) pur September ita atema senden September 26, 2023 nü amentsü, ta sangdong ka ajanga ashi.

Iba senden ya Deputy Commissioner, Niuland indang Conference Hall nung anepdang 11:00 ako nungi tenzuka amentsü, anungji züngsem ajak medema arua adentsü ayongzük, ta sangdong ajangasa ashi.

Women's Reservation ajanga India tarutsü tia melenshitsu: PM Modi



Parliament nung Women's Reservation Bill agizükba sülen September 22 nü BJP Headquarters, New Delhi nung 'Nari Shakti Vandan-Abhinandan Karyakram' sentong nung Ato kilonser, Narendra Modi-i jembiba noksa nung angur.

New Delhi, Rongjui/September 22 (Agencies): Hokolbarnü Ato kilonser, Narendra Modi-i, Women's Reservation Bill (Nari Shakti Vandan Adhinyam) ya atamata ozüng ka masü saka India tasenbai iba telemtetba agiba sangdonger, ta ashi.

New Delhi nung aliba BJP headquarters nung Nari Shakti Vandan-Abhinandan Karyakram sentong nung jembidang Modi-i, "Nari Shakti Vandan Adhinyam ya atamata ozüng ka masü; iba ya India tasenba indang democratic sangdong ka lir. Iba ya Modi-i tetsürtem leniba nung terenlok atema nangzükba atalokba kuli lir," ta ashi.

Ato kilonserisa Parliament House anaprongla nungi Women's Reservation Bill agizükba atema linük nung tetsür ajak nem tenüngsang agütsü.

"Tanü ni linük nung tetsür ajak nem tenüngsang agütsür. Yashi aser yakünü asenoki puti otsü tasen ka yangluba nguogo. Iba puti otsü yanglutsü atema nisung crore aikati asenok nem maongka agütsü. Iba telemtetba agiba aser iba anogo ya tarutsü putu nunga maneni jembitsu. Parliament House anaprongla nung majority ajanga 'Nari Shakti Vandan Act' agizükba atema ni linük nung nübur ajak nem tenüngsang agütsür," ta pai ashi.

"Khenkenbo telemtetba ka agiba ajanga linük tarutsü tia

melenshitsu. Tanü iba amaji telemtetba ka agiba asenoki kulisüa nguogo," ta pai ashi.

"Linük nüburtemi tesüiba küm aika bilema aliba tangbo atangji atalokogo. Parliament House anaprongla nung vote aika ajanga 'Nari Shakti Vandan Act' agizükogo," ta pai ashi.

"Parliament House anaprongla nung iba Bill agizüktetba ajanga majority sorkar aliba linük kati inyaktetba sayur," ta shia iba bill pusemba party ajak aser MP tem dang pelaba lemsatetp.

"Tanü linüki tetsütem, aianutem aser jalatemi ajangshiba tetsükdaktsü ajak agiener. Women's Reservation Bill atema tetsükdaktsü aika liasü, ajisüaka kodang nükjidongji temerük südir aser teladak südir tetsükdaktsü ajak kokteter. Parliament nung aikati iba bill pusemba atema ni party ajak aser MP tem dang pelar," ta Ato kiloneri metetdaktsü.

Tesüiba küm 9 tsüingda BJP-i aniba central sorkari tetsütem aser aianutemi ajangshiba tetsükdaktsü ajak agientsü merangogo, ta pai ashi.

"Asen aianutemi akhümtsübu angutsü, security angutsü aser azükarutsü atema ozü sorkari schemes aika tenzüka ka sülen ka ta inyaka aruogo. BJP sorkari tetsütem aser aianu million aika nükjidong ataloktsütsü atema maongka nguogo," ta pai ashi.

"Anungji party ka ama onoki

linük tama südaktsür, BJP nung inyaker ka ama khuret abenba sensotem akümer, aser iba ya onok atema akhümket lir," ta paisa shisem.

Kasa sentong nung BJP nungi tetsürtemi Modi nem tetushi agüja liasü.

Kasa sentong nung jembidang BJP national Tir, JP Nadda-i Parliament nung iba bill agizükba atema Modi nem tenüngsang agütsü.

Nadda-i, Ato kilonseri mangdang yur temelungtetba tulu nung inyakba ajanga mapang tetemsü nung 'Nari Shakti Vandan Bill' agizüktetogo, ta ashi.

"Ato kilonser Modi lenisüba nung tongtibang telemtetba aika agiogo. Item telemtetba ya tetsürtem nem tashi agütsütsü nükjidong nung liasü, aser ibaji ajanga India linük tarutsü tia melenshitsu," ta BJP Tirisa metetdaktsü.

Women Reservation Bill ya ajanga Lok Sabha aser state assemblies nung tetsürtem atema menden shilem 33 wazüka yutsütsü.

Parliament aser Legislative assemblies nung tetsürtem nem menden wazüka yutsütsü atema party aikati nangzüka aruogo, ajisüaka tang ang iba ya atangji ataloker.

Bodhbarnü Lok Sabha nung party aikati pusema Women Reservation Bill agizüka liasü aser Brihostibar aonung Rajya Sabha nunga vote agütsütepa iba bill agizük.



September 22, 2023 nü AICC headquarters, New Delhi nung Congress lenir Rahul Gandhi, den party lenirtem- Jairam Ramesh aser K.C. Venugopal nungeri osangbenertem senden ka nung jembidang tangokba noksa nung angur.

Deve Gowda'er party JD(S)-i BJP-i aniba NDA teloktep nung denogo

New Delhi, September 22 (Agencies): Sangküm küm tetenzüklen Lok Sabha election agitsü lia Karnataka nung Janata Dal (Secular) party-i BJP-i aniba National Democratic Alliance (NDA) teloktep nung denogo, ta BJP-i metetdaktsü.

Hokolbarnü Bhartiya Janata Party (BJP) National Tir, JP Nadda-i X ajanga JD(S) party-i NDA teloktep nung adenba osang metetdaktsü.

Janata Dal (Secular) ya taoba mapang Ato kilonser, HD Deve Gowda-i tentetba party lir. Gowda ya June 1996 nungi April 1997 tashi India Ato kilonser liasü.

Par jabaso, Kumaraswamy-i JP Nadda aser Union Home Minister Amit Shah na ajurua senden amenba sülen NDA nung adener.

Nadda-i, "JD(S)-i National Democratic Alliance nung adentsü atema telemtetba agiba asoshi ni pelar. Onoki parnok NDA nung melungsoa agizüker," ta metetdaktsü.

HD Deve Gowda aser par

jabaso HD Kumaraswamy nati Parliament nung Amit Shah aser JP Nadda na ajuruba sülen anogo ka lir NDA nung adener.

2024 küm Lok Sabha election nung Karnataka state nung JD(S) aser Bharatiya Janata Party (BJP) longjemer tokteptsü atema iba senden nungji jembia liasü.

Tamalen Karnataka nung BJP lenir aser taoba mapang state chief minister, BS Yediyurappa-i, taruba Lok Sabha election nung longjemer tokteptsü atema party-i JD(S) lenirtem den jembidar, ta metetdakja liasü.

2019 küm Lok Sabha election nung JD(S) ya Congress-i aniba teloktep nung dena liasü aser iba mapang nungji Karnataka nung Chief Minister H D Kumaraswamy leniba nung Congress-JD(S) teloktep sorkar liasü.

Osang angazükba agi, JD(S)-i Karnataka nung Lok Sabha menden pezü nungi tokteptsü. Karnataka nung Lok Sabha menden 28 lir.



September 22, 2023 nü Jammu nung Jammu Air Force Station Diamond Jubilee amongdang Indian Air Force's (IAF) Garud Commando temi shilem agiba noksa nung angur.

UNGA senden mapang Quad Foreign minister tem jurila senden amen

New Delhi, Rongjui/September 22 (Agencies): Hokolbarnü New York nung United Nations General Assembly (UNGA) senden aliba mapang Quad züngsem linük pezü nungi foreign minister tem jurila senden ka menogo.

Quad züngsem linük pezüji-India, Australia, Japan aser United States lir.

Quad senden nungji India External Affairs Minister S Jaishankar, US Secretary of State Antony Blinken, Australia Foreign Minister Penny Wong aser Japan Foreign Minister, Yoko Kamikawa nunger aden.

Senden nung jembidang US Secretary of State, Antony Blinken-i, US-i maneni UN Charter nung aliba nükjidongtem atema inyaktsü, ta ashi.

Quad linüktemisa Ukraine nung rara atema tebilemtsü

akaba lemsatetpa den külemi Ukraine nung teti atema yimjung atema inyaktsü ayongzük.

Quad foreign minister temi külem sangdong ka ajanga, "Iba rara nung nuclear amshiba onoki anemer aser nuclear amshitsu amokmerenba magizüktetsü," ta metetdaktsü.

Linük pezüisa North Korea-i ballistic missile technology amshiba aser UN Security Council bangzüngtem anema nuclear missiles maneni tendangba aitsü.

Quad linüktemisa Myanmar nung yimtenren aser rongsenkettsüng tsütsü timtem aliba den külemi meimchir aika timtemba atema tebilemtsü akaba lemsatetpa aser iba linük nungji rara anentsü ayongzük.

Taruba Quad foreign minister tem sendenji sangküm Japan nung ayongzüka amentsü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

RONGJUI 23, 2023

Tetsürtem shilem balaka

Rajiv Gandhi mapang 1989 küm nungi taoba ato kilonser Manmohan Singh mapang tashi linük nung tetsürtem nem yimten nung shilem agidaktsütsü asoshi shilem balaka shiteta yutsünüa kanga meranga jembia aruogo, ajisüaka tatar senden anaprongla, Lok sabha aser Rajya sabha nung telemtetba magiteti aruba sülen tang tesüsa Narendra Modi mapang tatar senden anaprongla nung tatar ajaki amato mulunga Lok sabha aser Legislative assembly nung tetsürtem nem noklang shilem nung menden 33 balaka shiteta yutsütsü telemtetba agiogo. Atangji, tetsürtem asoshi tatar senden nung menden balaka shiteta yuja meliaka, tanga tangar state-tem nungibo Lok sabha aser Rajya sabha nung tatar yimsüsür watsü tajung aika angur. Ano, jangratemtsü kaji, tatar senden nung amener watsütemji odang tenüng agi ola madoki amener masü saka pei lima aser nübortem asoshi teburtem dang nungibo tajungba shilem agia jembiba angashir. Asenok Naga nungertema tangbo pi tsüngdang nümadangteta state legislative assembly nung tetsür anabo mena lir. Iba jagi Nagatsürtema tangar menepa yimten nung shilem agiteta akümba alima nem metetdaksür. Atangji, tang tatar senden nung tetsürtem asoshi tatar menden noklang nung shilem 33 shiteta yutsütsü latetaka, tangsa tangbo mapa kuma moutettsü, kechiyong tang ya linük ajaklen parliamentary aser assembly menden asetshiteptsüba mapang lir aser itemji timi shitak inyaka aotsü atema 2024 küm linük nung nütsüng yongsük khen sükdangtsü aser iba nungji ajemdaker, Lok sabha atema parliamentary constituency-tem state ajak nung asetshiba sentong tenzüksü. Iba mapaji temer külenang tasensa asetshitepa yanglushiba constituency-tem rongnungi tetsürtem asoshi menden 33 % balaka shiteta yutsütsüba inyakyimji tenzüksü. Aji oda, yimten nung tetsürtem anioka shilem agidaktsütsü asoshi tatar menden noklang nung shilem 33 shiteta yutsütsü lemtetbaji kin ka tejakleni aotsü atema agiba telemtetba tuluka asütsü. Aji oda, tangsa tang iba telemtetba ya mapa kuma meinyakaka, küm trok sülen 2029 küm parliamentary election agitsüsa kümra, iba küm, iba election nung jagi yimten nung tetsürtem shitakba noklang nung shilem 33 ji angutsü. Ibaji kodang atalokdir, state assembly aser Lok sabha nung tebur ana shia tetsür kaka amentsü. Iba sendenji koda jangratemtsüka asütsü ta tang yongi yimdangi arua bilemer. Atangji, Nagaland nungbo tang tashi Urban Local Bodies nunga tetsürtem nem 33 % shilem magütsütet kangshiteper, anungji tang parliament nung latetba ozüngji Nagaland nung alir lisopurtemi agizüktettsü asü magizüktettsüar mapangi dang ashitsü. Atangji, asenoki dang asenok temeten mamshiteter dang ashi, India temzüng arla 371 A ajanga India parliament nung Naga nung sobaliba, ali rongsen aser tsüka-okaba maparentem dak aketba onüktem dak kongshitsü makoker, anungji tang amaji tetsürtem atema yimten nung shilem balaka shiteta yutsütsüba telemtetbajia Nagaland Legislative Assembly nung süoka jembir agizüktet nung dang Nagaland nungbo mapa kuma inyaka otettsü. Atangji, yimten nung tetsürtem asoshi menden balaka shiteta yutsütsüabajia teti atema masü, aji tanur jaja ao tenzükdang jajadaktsütsü atema khen teben nung amer jajar amai lir, anungji khen atemabo teburtemia tetsürtemji yimten mapa nung anioka shilem agidaktsüba jagi ajak ajangzüksü. Meimchir yimya nung kasa nisungsa süaka tetsür tanepba aser ochitashiba, anungji tetsürtemi kodang yimten nung shilem agidir teburtem dang nungibo terben agi ochitashiba aser tajungba asütsü imlar. Ashiko, tesem aika nung tetsürtem asoshi wazüka yutsüba yimten menden nung amener tetsürtemji pei kinungbo mesüra pei tsürabur melen aitba tetsürtemang asütsüa akok, kechiyong tesem aika nung yimten nung yimsüsüba menden ya senmang amai kumogo. Item teblemstütemji tetsürtemi akoktsü merangtsüla. Iba jagi dang tetsürtem asoshi yimten yimsüsüba menden 33 % balaka shiteta yutsüba nükjidong tongteta tetsürtemi pei lima topur junga yanglutettsü.

OLEMSABANG

Mitkar meita anüktsü atema tanga mitkar kar ayutsü asü ???

L. Kika Pongener

27th July' 2023, Tir Yimyim osangkaket nung, Nagaland Police Central Store, Chumukedima nungi Injang auya-a ayokba putet... ta osang ka züluba ngua, nubur aika aoksaogo aser süngmangogo. Aser iba mapa nung aija alirtemji, tangar kira-longrar/ashi-auer kar masü, saka mitkartem kar-ang tongti sur anir inyakba mapa ka... ta ngua tesungmangtsü mapa dang masü, saka alima nübur dang maaksü mapa tulu ka...ta kanga sasasetta bilemogo. Atangji, iba mapa ya otsüsütsü mapa ka asütsü, kechiyong sorkar meyong/nübur meyong oset (Public Property) mesamai kümzüka ayutsü atema tanüker/mitkar ayurtema dener, iba ama mapa inyakbaji tesungmangtsü mapa ka asütsü. Ano tanga mapang kar nung, mitkar kari pei Gari nung ozüngi memelaba oset, temesepba chiyungtsü, yamala bener lia apoba otsü/osanga nguogo. Sürabangla, yi aser drug bener alirtem tenük yoka meita reprangtsüpurtem-iang aibelenra (?) Nüburtemi shirnok dak temulong alemtsü...??? Hau-niii...kar meshidaker aliyong küla...ajak meshidak ta ashir masü ako, ajioda, pei nem nungloktsüba mapa shidak ochishia inyakba mitkar aika lir-ko. Taküm Indian Independence day anogo nunga, mitkar aika 'Medal' anguba ngua kanga pela-a reprangogo, saka kar meshidakba meji nung tajunger dena tenüng menuktsür. Anungji iba mapa aser tatalokba ya sorkar department atema-a konang masü, saka alima matsüngdang tamakok aser maaksü tulu ka asütsü. Iba tatalokba ya ngur, nuburtem mulong nung asüngdangbaji... Sürabangla, mitkartemji meita anüktsü atema tangar mitkar kar ayutsü asü...???

Ano aji dang masü, asen Naga lima Jila-tem nung yi aser temesepba chiyungtsütem kanga bulua ayokba angur. Sürabangla, item temesepba chiyungtsütem ya koba lenmang/kolen nungi asen lima telungi bener aiter (...ta kanga arokaroka shisadangtsüla ka lir, kechiba sura temesepba chiyungtsü drug aser yi ya asen lima nung adoker/yanlur masü, Assam-India lima ajanga dang asen limai bener arur. Talisa, ano asen kidanger Manipur len nungia mapang kar nungbo bener arua alitsü akok. Aji oda, kolen koba-len nungia suang... kodaser sademsadema bener aitteter (?) Atangji, item osettemji kolen nungi (?) Mesura koba lenmang nungi asen lima telungi sademsadema bener aiter (...ta tasüngdangba ka arur, kechiyong tanga lima nungi asen limai aruba lenmang ajak nung, sungküm (Gate) nung tanüker/mitkar tesashi teperi yua lir. Anungji item tanüker/mitkartemji paitoker melamela-a, item ozüngi memelaba temesepba chiyungtsütemji bener maittetsü südi...ta nüburtemi-bo bilemer. Sürabang... kolen nungi kodaser bener aittsü akoker ???...ta tebilemdangtsü tuluka lir.

Aji oda, kanga tesungmangtsüka, asen lima jilatem nung, yi aser temesepba chiyungtsü kanga bulua ayokbaji, odangpo masü, lenmang kar nungi sadem-sadema bener arur südi...ta nüburtemi temulong melemi bilemer. Iba ama mapa ya angudang, nübur ajunga mulongjang nung tasüngdangba ka asüngdang...??? Asen Naga lima nungbo tanüker/mitkartem madak ya, ano parnok meittsü/anüktsü atema ozüng tesashiba aser tashi tuluba akaba tanüker/mitkar kar ayu nungang ajungtsü asü na ???!!!...ta aiben shisadanger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Texas A&M Corpus Christi sentong nung kaketshir 124 bapti



Texas nung Corpus Christi campus, Texas A&M University nung 'One Night' tekülem sentong nung adenertem tangokba noksa nung angur.

September 22, 2023: Tawa Texas nung Corpus Christi campus, Texas A&M University sentong nung kaketshir 1,000 dak tema aden aser kaketshir 120 baptiogo.

August 31 aonung New Life Church of Corpus Christi-i University campus nung ayongzükba tekülem sentong "One Night" agi. Iba sentong ya tesüiba küm 8 tashi küm shia agia arur aser taküm agi tanabenbuba campus nung iba sentong agi.

Osangbener den jembidang New Life Church Young Adults Pastor, Tarik Whitmore-i, parnok ministry-i 2015 küm nungi Texas A&M nung ministry mapa inyaker, aser küm shia iba sentong agia arudang kaketshirtem teimba-teimbai item sentong nung adener, ta ashi.

Whitmore-i, yaküm iba sentong nung nisung 600 shi aden aser nisung 51 baptia liasü, saka takümbo iba sentong nung

nisung 1,000 dak tema aden aser nisung 124 bapti, ta metetdaksü.

"Tekülem sentong tetenzük nungi sayatenya atalokba meteta liasü aser tashi tulu liasü. Lokti nungji onoki Tenla kidang kodanga mengudangba nisungtema liasü, aser parnoki Yisu tenüng sanga liasü," ta paisa ashi.

Whitmore-isa 'One Night' sentong agitsü anogo ishika jakdang pa den NLYA züngsemtemi iba sentong agitsü osang proka liasü, ta ashi.

Iba sentong nung Whitmore-i sayutsingia liasü. Iba tekülem sentongji mezüja shimtetba sentong ka liasü aser pai jembuiba oji kaketshirtemi tenok-tenoka anga.

"Ni sayutsingir tajung ka asübayong masü saka tashi balakati mapa inyakba ajanga onok yaria liasü," ta pai ashi.

Iba sentong nung kaketshir aikati baptisü telemtetba agi aser parnok rongnung karbo

tang mezüng university class nung adenertem liasü, ta pai ashi.

August 31 nü iba sentong agiba sülen par Arogoi kaketshirtem telok-telok lemsar sentong ayongzüka agitsür.

NLYA-i ita shia campus nung tekülem sentong balala ayongzüka agir, aser tang tesüsa September 14 nü ayongzükba sentong nung kaketshir 200 dak tema aden aser nisung pongu baptia liasü.

Taküm February ita nung Kentucky nung aliba Asbury University campus nung tekülem sentong ka agia liasü, saka sentongji manenteti anogo 16 tashi agi aser iba sentong nungji US tesem balala nungi nisung meyrjang aika arua aden.

Iba sülen nungjagi US tesem balala nung aliba University campus aika nung asentenshi milak jangrua kaketshirtem aikati Khrista agizükogo.

ANOGO ABEN TSÜNGREM DEN

Aonung shilem

T.ken 134:1-3

Doctors aser nursetem mozü kidang aonung inyaksü lezmüksür. Sepoy, police aonung parnok alidak lezmüksür. Kodang aonung kija mapa nung noktaker azüngmeyaka bilemer, idangji T.Ken 134ji bilemtetang.

Tsüngrem kodanga manüner mesüra memejanger. Anungji, asenoki mapang ajak nung Pa tenzüksü aser tushitsü akok. Ken züluri ashir idakji Tsüngrem kidang aonung aser anüngdang Tsüngrem dang sarasademsü aser Pa tushitsü putirtemi lir. Tekülemdak maneni tekülemdak nungi tenüng asangba aser sarasademba liasü.

Asenoki aonung mapang nunga Tsüngrem moatsütsü akok. Taküm nung asenoki aonung timtem ajanga aodang Tsüngrem tenüng asangtsübaji temela masü. Saka Pai asenok nem aonung ken agütsür. Paul aser Sila Filipi tepuokdak Tsüngrem tenüng asangtsü koka liasü (T.M.16). Parnok aonung shilem (shift) nung liasü. Tsüngrem saka lir ta parnoki metetta liasü, aser Tsüngremi teyari yok. Pai parnok tepuokdak nungi anitet. Asenoki aonung mapang memetetba temoatsütem angutsü akok, kechiaser Tsüngremi leman balala nungi asenok den jembir.

Tangari nai aonung tenüng asangba mangutsü akok, saka Tsüngremibo angashir aser angur.

Na anüngdang mesüra aonung liang, nai anüngdang süang mesüra aonung tenzükang, nai Kibuba tenzükur ta bilemtettang. Kechiaser pai kodanga memejanger, Pai ne sarasadem aser tenüng asangba mapang ajak nung angashir, aser Pai na moatsütsü.

Uttar Pradesh nung police-i pastor, Bजारang Rawat apu

New Delhi, September 21 (Agencies): Uttar Pradesh state nung pastor kati tangartem Khristan yimsü dangi meypdaksür, ta tai tonglokja apu.

Lucknow District kübok Mohanlalganj nung arrshi küm 47 pastor, Bजारang Rawat-i tangartem mesüzüka Khristan yimsü dangi meypdaksür, ta tai tongloksü.

Police-i pastor ket nung aliba Laishiba ka kuli agütsüba dak alaka pa anema tanga kuli kecha magütetsüti liasü.

Osangbener den jembidang pastor-i, "Magistrate-i police dang, 'Laishiba bona alibaji ozüng alema masü aser ozü kidanga Laishiba ka lir' ta ashi. Police jagi ola kecha madok saka ni jail nung puok," ta metetdaksü.

July 16 nü police-i pastor Rawat apuba sülen August 7 nü bail nung chiokogo.

Pastor Rawat ya tamalen Hindu nung liasü saka pai Khristan yimsü dangi meypa liasü.

Uttar Pradesh Prohibition of Unlawful Conversion of Religion Act, 2021 kübok pa anema Loni Katra police station nung ken o benoka lir.

Tasüngnüji police-i pa District and Sessions Court, Barabanki matsüngdangi anir ao, aser court nung obendanger jagi police dang pa apuba kuli asüngdanga liasü; ajisüaka police-i obendanger dang pa ket nung Laishiba aliba indang ang

ashi. Pa tepuokdak aliba mapang nung Hindu yimsü alia amangertemi pa indang shishilembaba stall raksatsü aser iba tesem nungjagi meindok, anungji par kibong timtem tensa ka nung lir.

Police, osangbenertem aser Hindu yimsü alia amangertemi pastor-i tangartem mesüzüka yimsü meypdaksüba indang kuli ka danga magütsütet.

Police-i pa indang ken kaketter aser Laishiba apuba sülen Haidergarh police station-i anir ao. Pa dang mapang tatsüka asüngdangyaba sülen chiok. Ajisüaka kasa aonungji police-i pa tanaben pua police station-i anir ao.

Police ketdangser kati pa dang par Arogo nung tekülem sentong agiba video kar sayu.

Police ketdangser jagi Pastor Rawat dang, "Nai lokti atema mapa tajung inyaker aser nisung karibo nai parnok shirang aneptsüba kuli asür, ajisüaka ketdangsertem aser nisung aikati na anema nokdaker," ta ashi.

Police ketdangser jagisa pastor dang, na shisa tebulu kechiyong na anogo asemnü tsüngda chioktsü aser na amokmerenertem aputsü, ta ashi.

Pastor-i, "Ajisüaka tang tashi kecha mataloker. Ni jail nung anogo 23 tashi puoka ayuba sülen ang bail nung chiok," ta ashi.

(Maneni tapak 8 nung...)

Kumlong Arogo nung Yimjung Kenten sentong ayongzüka agi



Mokokchung, Rongjui/September 21 (TYO): Kumlong Baptist Arogo, Mokokchung nung September 21, 2023 aonung Christian Education Ministry-i ayongzüka Yimjung Kenten Sentong (Peace Concert) ka "Actions

for Peace" ta asüba omen nung ajemdaker agiogo.

Iba sentong nung tanurtemi kongki ola balala atem aser tenüngsang ken balala kija aser teloki tena iba kenten benjong kanga dang temoatsüma nung agi.

Iba sentong nung Asso.Pastor Christian Education Ministry Kr. Moanaro Imchen-i olen kar shia tanurtem ayongzüka jembia aser sentong nung Kumlong Baptist Arogo Children Choir-ia ken ka tena liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Samanir

- (n) Ien sapoka anir, mezünpur (pioneer)
- * Mapa tajung aika nung Aortem ya samanir lir.

Samarama

- (v) masütsüym agi asüba (unnatural death)
- * Akhidangbo samarama atalokba ya kanga ashibanga liasü.

OLONG PAITEP # 6645

	1		2		3		4		
	5		6						7
						8			
9		10							
11									12
					13				
				14					
15									

TIPIEN

- 2. Taküm nung atura mapang - (8)
- 5. Perir anüంగా - (6)
- 8. Iba mapang - (4)
- 10. Tetsüng nung shilem ka - (7)
- 11. T _ _ _ _ en - (4)
- 14. Tetenzük - (6)
- 15. Moko achiba oset - (8)

LANGTSÜNGLEN

- 1. Joko ojang - (5)
- 3. Kibong raksa - (4)
- 4. Jongdak - (6)
- 6. Temang aremdak - (5)
- 7. Yagi ozü apur - (4)
- 8. Chiyungtsü asangba tzü - (5)
- 9. Tekolok meshitak - (4)
- 10. Tenük-telen majung - (6)
- 12. Ajiteter - (5)
- 13. Tebur tanur dang ajaba - (4)

OLONG PAITEP # 6644 TELANGZÜBA

TIPIEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.


NAI-A YA METETTER MA



Alima nung mezüngbuba nüburtem nem angati dang 'wifi connectivity' agütsübaaji Taiwan lir. I baji dang masü parnoki bendanglen nungi arur raliwalirtem ajak nema kasa maongkaji agütsür.

Koda jangratemtsü!

Noksa nung Triangle aser Square kwi lir ?



Assam TMC tir Ripun Bora-i Durga puja tax magizüker



Guwahati, September 22, 2023 (Agencies): State sorkari Durga Puja nung tax agütsü lemtetba atema Assam Trinamool Congress president aser taoba Rajya Sabha MP Ripun Bora-i ashishiteper. "Assam nung BJP sorkar sentsüh agi timtemer aser iba jagi sector ajak nung tax agir.

Municipal taxes, transport taxes, electricity aser tanga nung tax teimba agiba sülen Chief Minister Himanta Biswa Sarma-i aniba sorkari tang tamangba yimsü benjungtem nunga tax agir" ta Ripun Bora-i ashi. "Durga Puja amala tamangba yimsü benjungtem

nung tax agiba ya magizüker. Durga Puja committee shiai Durga Puja atema Rs 300 aser sünyanglu tzü nung enokba atema Rs 100 tax agütsütsü. Iba lemtet ajanga nübortem temulung yirutsütsü" ta Assam TMC president-isa ashi.

Assam sorkari iba lemtet agiba magizüker. Goddess Durga külemba atema nisungtemi tax agütsütsüsa kümra ibaji kanga dang tesasatsü tensa ka asütsü anungji state sorkari iba lemtet meyipa agütsüla, ta Bora-isa metetdaksüogo.

Puja committee temi treasury challans ajanga tax agütsüba sülen dang Durga Puja amongtsü mesüra sünyanglu tzü nung enoktsü akok ta Assam sorkari lemtet agiogo.

Gauhati HC-i police ket nung asür kibong nem sen agütsütsü tuyur

Guwahati, September 22, 2023 (Agencies): Jorhat Police Station nung nisung ka asüba atema Gauhati High Court-i Assam sorkar dang Rs 5 lakh agütsütsü tetuyuba agütsüogo. Justice Achintya Malla Bujur Barua aser Justice Mitali Thakuria na adenba division bench kati police station nung asür tedi Sabir Ansari-i benokba ken o angadamba sülen iba tetuyuba agütsü. October 19, 2021 nü police-

i Ansari apu. Jorhat Police Station nung Indian Penal Code nung Section 380 (theft) kübok pa anema ken o benoka aliba atema apu saka tasüngji pa sür lia angu. Police-i Ansari reshikangshia südaktsü ta parnoki kinungertemi tai tongloksü. Parnoki judicial inquiry ka aser CBI nem bushisüngdang südaktsütsü aser temenok meshia liasü. Police ket nung lia Ansari

asü aser police-i iba atema kuli tejangja magütsütet ta Gauhati High Court-i ashi. "Supreme Court-i Re-Inhuman Conditions in 1382 Prisons nung oshidang agütsüba nung shia aliba nung asür Sabir Ansari densemstü akok. Iba writ petition nung shia aliba ama state sorkari asür Sabir Ansari'er kibong nem Rs.5,00,000/- (Rupees Five Lakhs) teyari agütsütsü metetdaksür" ta GHC-i ashi.

Taoba Manipur chief secretary-i RCU Chancellor inyaktsü

Itanagar, September 22, 2023 (Agencies): Arunachal Pradesh nung aliba Rajiv Gandhi University (RGU) nung Chancellor inyaktsü atema taoba Manipur chief secretary J Suresh Babu shimogo. Itanagar anasa aliba Rajiv Gandhi University (RGU) ya Arunachal Pradesh nung university tejentiba lir. Maneni Arunachal Pradesh nung central university iba ya dang lir. Taoba Manipur chief

secretary J Suresh Babu-i Chancellor inyaktsü ta Rajiv Gandhi University (RGU) ketdangsürtemi ajanga metetdaksü. Babu-i küm pungu atema Chancellor inyaktsü aser President Droupadi Murmu-i pa RGU Chancellor inyaktsü shimba mulunga agizükogo. "Taoba Manipur chief secretary J Suresh Babu-i ketdangsübaren nung aika ajangshia lir anungji pa ama nisung ka ajanga university

tajungba kümdaktsütsü" ta Rajiv Gandhi University (RGU) registrar Dr NT Rikam-i metetdaksü. RGU nung 2018 nungi Chancellor mali dang aruogo. J Suresh Babu ya Guntur Medical College nungi MBBS azünger aser PGI-Chandigarh nungi MS ka lir. Pai küm 34 tashi Indian Administrative Service (IAS) officer ka ama inyaka arur Manipur chief secretary menden nung lia sodi angu.



Assam nung aliba Royal Global University (RGU) nung Brihostibarnü International Peace Day amongdang agiba noksa angur. Iba sentong ya Peace Club ajanga ayongzük aser St Stephen's College, Delhi University nung taoba vice principal Father Clement Raj Kumar-i tongti o jembia liasü. Iba sentong nungsa Vice chancellor Prof (Dr) SP Singh-ia o jembia. RGU nungsa Royal School of Fashion Design and Technology nung Royal Boutique lapok aser iba sentong nung Fashion Designer & Indian Weaver Alliance founder Saumar Sharma aser Fashion Designer & White Lily Production Company founder Mithu Boiragi na aden.

US-i Ukraine nem ano sen million \$128 jenjang teyari agütsütsü

White House, Rongjui/Sept. 22 (Agencies): Russian sepaitemi tashiyim ajak amshia Ukraine amak tenzüker Ukraine Tir Volodymyr Zelenskyy-i Washington, DC tanaben semdangogo.

Saka pai United States Capitol mezüing semdangba mapang ama masü tan semdangba mapang congress-i rara nung yaritsü tejangraba tajemba liasü, ajisüaka Democrats temi Ukraine den nokdaksü nangzüka liasü.

Brehostibarnü White House Cabinet nung shilem magidang Zelenskyy-i tepela o lemsateper aser Washington den jembishinüba nung tajangzüng lir ta ashi.

"Anogo 575 asoshi nenok dang kanga pelar," ta Russia-i February 2022 nungi tenzüka amakba mapang athishia pai ashi. "America nunger dang kanga pelar, tanü tashi parnok külemi onok den, Ukraine den, nübürtem den nokdaka lir."

Mitkar tsütsü sen million \$128 jenjang teyari tasen agütsütsüba indanga pai ashi, koba US Tir Joe Biden-i Brehostibarnü sangdonga liasü.

"Tang ozü sepaitemi nüngdakbaji ibai lir aser iba teyari ya tashi tulu lir," ta pai ashi.

Democrat nungi Biden-i iba teyari asoshi pa tashi amshia liasü.

"US-i Ukraine nem ano security tsütsü teyari atema ni tanü melaogo, yangji artillery tali, injang tali, anti-tank weapons tali lir. Aser taruba hopta US Abrams tanks tem Ukraine nem agütsütsü," ta Biden-i ashi.

United Nations nung alima lenirtem teyari bushia Zelenskyy ya hopta tetenzüklen New York-i oa liasü.

2022 küm nungi Russia-i tashi ajunga amshia amak tenzüka sülen Ukraine nem

US-i senotsü teyari agütsüba ama danga linük katia agüja mali, aser item teyariji timba mitkar tsütsü yariba lir.

US Congress yagia sen billion \$11 dak tema indang teyari agütsütsü melaogo. Saka tesüsa Congress-i teyari agütsütsü atema vote agitepba ya December nung liasü aser House of Representatives ya Democrats temi amokbanga aliba tangbo Republicans temi amokbanger lir.

Ajisüaka Biden-i Congress dang Ukraine asoshi teyari sen billion \$24 tali agütsütsü melang ta ayongzüker, koba Republicans, talisa far right temi nungnanga liasü.

Züngsem kari Ukraine nem teyari agütsütsüba sen ajemtsü aser linük nung ang temolung agütsütsü aser sorkari senotsü indokba ajemtsü ashi.

Iba tangatetbaji Brehostibarnü Zelenskyy-i Capitol Hill sema jajaba mapang ajitet.

Zelenskyy-i December ita semdangba mapang ama pai Congress teloktep senden nung jembitsü asüngdangba House Majority Leader Kevin McCarthy-i memolung, ta osang kar ajanga ashir.

Ukraine tiri ozüing yanglurtem den senden amenba mapang Republican Congress züngsem 28-i shiti ka nung meyongnem agüja Brehostibarnü sangdongba nung Ukraine atema senotsü tali agütsütsü memolungi liasü. US Congress nungya budget legislation agizüktsü asoshi September 30 ya tatembang lir, aser mesüra sorkar shibangtsü.

"America nungeri parok sen koloni ao, aji metettsü temeden lir. Rara koma aor? Ukraine-i rara akoktsü ya ita trok tejakdang ama dang asü koda? Asen tasaji kechi aser tir indang sentong kechi lir?" ta Republican züngsem 28 yagi zülu.

Telangzüba makai Tir

Biden-i mepishiba ama temelaba agütsütsü ya congress tebilemetsü lir, ta parnok ashi.

Ajisüaka Congress nung aliba Democrats temi Ukraine dak sen indoktsü bhukuma nokdaka liasü.

"Ibai Ukraine aser Russia tsüngta raraba lir. Ajisüaka ibai alima sapang nung democracy aser autocracy tsüngta, temeden aser tashiyim amshia amokbangtsü merangba, ochi aser olulu tsüngta, tajung aser temenen tsüngta raraba lir. Aser takok mangu tashi Ukraine den nokdaksü kanga tongtipang," ta House Minority Leader Hakeem Jeffries-i Brehostibarnü shia liasü.

Mapang tatsüka lir White House Cabinet senden nung Biden-ia aji mesükba o jembia liasü.

"Tashiyim amshia kidanger litsü-lika agitsü memelatsü ta alima ajunga tangatetba nung lir. Item tangatetba nung America nübürtem atsüngzüka maotsü," ta pai ashi.

Cabinet senden nungi aotsü mapang Biden-i Zelenskyy den teka amtepa salem asü dang osangbener kati, Ukraine asoshi teyari meshiba ama agütsütsü US Congress-i melatsü asü, ta asüngdanga liasü.

Biden mapang tatsüka anen aser "United States Congress nungi telangzüba tajung agütsütsü imla atar. Temelen inyaksü kecha mali," ta pai ashi.

Timtem adokdaksütsü meranger masü: Canada PM

New York, Rongjui/Sept. 22 (Agencies): Khalistani kiralongrar ka tepsetba mechi India den tesendaktep mejungi aliba mapang, Ottawa-i New Delhi den rara mesütsü mesüra timtem adokdaksütsü meranger masü ta Canada Ato Kilonser Justin Trudeau-i Brehostibarnü ashi aser ochi kaktettsü asoshi külemi

Mulungnen-O



ASO : 1-8-1939

ASÜ : 14-9-2023

Onoki teti meima aliba asür ojala **Sangyulemla (Longjang)** iba akümüli tempanger teti anisüngzükdaki ogo. Onok mangyim tia nung alidang kija, kibong, Arogo aser lokti balala shirnokisa sarasadem den nübo, rongsen aser shisatsü agi nungita yariogo nenok ajak dang kanga pelaba lemsateper. Tebu Tsüngremi nenok mapa tajung maneni moajang ta ozü sarasadem.

~ Chirnur, Semchir aser Kinungertem.

Mulungnen-O



March 02, 1935 - Sept. 17, 2023

Temeim obala, **Rev. Matongsosang Jamir** (Chuchuyimlang) tasütait Kibuba'er tongpang nokinketer, shibai tammang nung aliba nübortem dangi Tsüngremer tesangwa bener oa nüchi kümdaksü, na mali onok rongjener, saka nai prokba metsü ali tatem tonga oa angu dang, onok mulung anisüngzüker.

Ozü temeim tsürabur iba akümüli nungi pilar, onok asüku mangyim jashi tia nung alidang, arogo, kiyonger, lokti tentet balala aser kija-kibong shirnokisa ozü den nübo, rongsen, shisatsü aser sarasadem agi nungita yaritepogo, nenok ajak dang kanga pelaba lemsateper.

Teyanglur Tsüngremi nenok ajak maneni moajang ta ozü tamang sarasadem.

~ Temeim Kinungtsü, Chirnur aser Kinungertem.



Mexico nungi US-i aruba migrant tem Eagle Pass, Texas kübok Rio Grande ayong nung tinzü mesanga aliba ajangtsü merangba noksa nung angur. Migrant temi iba Rio Grande ayong nung aliba Eagle Pass alema timba arur aser tesüiba ghonda 24 tsüngta nisung 8,600 shi iba tesem ya ajanga aru. Arütsülen tanüker timba kumdaksütsü mechi US Defense Department ajanga arütsülen sepai tasen 800 yoka lir.



inyaksü ajungshia liasü. India-i visa services anenja aliba Trudeau-i iba olen ya New York sülen par sorkari mera agiba nung United Nations General Assembly session 78 buba rara mesütsü mesüra timtem adokdaksütsü meranger masü, ta Trudeau-i ashi.

India aser Canada tsüngta yimtenren tsütsü tesendaktep majungba indang asüngdang dang, "Onoki India sorkar dang tongtipang linük ka aser iba ken o süoki ia agitsü aser asenoki maneni külemi ochi temai adoktsü asoshi onok den külemi inyaksü rara mesütsü mesüra timtem ayongzüker," ta ashi.

"Onok ya ozüing agi yimsü asüba linük ka lir. Canada nung nung kumzüka aser jenjang ayutsü asoshi onoki wazüka ayutsü asoshi onoki maneni nüngdakba mapa ochi kaktettsü asoshi onok den inyaksü. Tang onoki yangji rangloka lir," ta Trudeau-i ashi.

Canada nungertem atema **(Maneni tapak 8 nung...)**

Imchaba Master Memorial Nagaland Open Volleyball Trophy 2023 marok Ozümi Volleyball Team-i benogo



Mokokchung nung 16 Buba Imchaba Master Memorial Nagaland Open Volleyball Trophy 2023 marok abener Ozümi Volleyball Team Mokokchung Deputy Commissioner Wb.Thsuvisie Phoiji aser iba Trophy ketdangsürtem külemi tangokba noksa.

Mokokchung, Rongjui/September 22(TYO): 16 Buba Imchaba Master Memorial Nagaland Open Volleyball Trophy 2023, September 19 nü nungi 22 nü tashi Multi Sports Complex Mokokchung nung asayaba nung team ajak agi 19-i shilem agia toktep aser Final nung Ozümi Volleyball Team aser M.H-10, Kohima tsüingda asayaba nung tenaprong kanga dang merutepa asaya aser 26-24; 14-25; 22-25; 30-28; 15-13 ta toktepa asayar kelen iba takok marok Ozümi Volleyball Team-i benogo.

16 Buba Imchaba Master Memorial Nagaland Open Volleyball Trophy 2023 nung Champion-i Running Trophy den sen Rs.80,000, agizük, tanabuba jenjang ajangzük M.H-10, Kohima-i sen Rs.50,000 den certificate agizük, tasembuba ajangzük Chienino Brothers, Kiruphema-i sen Rs.30,000 agizük aser Pezübuba jejang ajangzük Peren District Volleyball Association-i sen Rs.20,000 agizük. Iba den ano jurila senpet Ozümi Volleyball Team nungi Wanglem-i Best Spiker senpet

sen Rs.5000 den certificate agizük, Best Setter senpet Ozümi Volleyball Team nungi Imnaakum-i senpet sen Rs.5000 den certificate agizük aser Player of the tournament senpet MH-10 Kohima telok nungi Rishitemjen-i sen Rs.5000 den certificate agizük. Iba Trophy Final asaya sentong metenzük dang Match Chief Patron Mokokchung Deputy Commissioner Wb.Thsuvisie Phoiji-i asayatem ajungshia mapang tatsüka agia jembia aser asaya temer kelen paise takok angur telok aser kija nem senpet aguja liasü.

NSF Martyrs' Memorial Trophy: NUSU Kohima aser End of Era nungeri akok



Kohima, Rongjui/Sept. 22 (TYO): Angami Students' Union ajanga Indira Gandhi Stadium, Kohima nung tang ayongzük aliba 23rd NSF Martyrs' Memorial Trophy, football asayamung Hokulbarnü asaya nung Nagaland University Students Union Kohima Campus (NUSU KC) aser End of Era nungeri takok angu. Mezüng asaya nung NUSU KC ajanga Rooster FC Phesama madak goal 2-1 agi akok. Iba asaya nung NUSU KC asoshi M. Phaowang (22)-i minute 28 buba nung goal ka

agütsü. Mapang tatsüka anisüngzükba sülen Rooster FC nungi Abei Kaimo (21)-i minute 46 buba nung goal ka agüja liasü. Ajisüaka minute 76 buba nung M. Phaowang-isa ano goal ka agütsü aser iba goal meküpzükteni asaya tembang. Iba asaya nung Man of the Match sempet ya M. Phaowang nem taoba Angami Students' Union tongti zülur Mhalievilie Medoze-i amokja liasü. Tanabuba asaya nung End of Era-i goal 2-0 agi Chüziema FC

madak takok ngua liasü. Asaya tenzük minute 12 buba nung Medoneito (22) ajanga mezüngbuba goal ya agütsü aser maneni tanabuba goal ya Nyithong (7)-i minute 56 buba nung agüja liasü. Iba asaya nung Man of the Match sempet ya Sanyem nem taoba mapang Angami Students' Union ketdangsür Kezhazier Angami-i amokja liasü. **Matches for Sep 23:**
1. Asiifii Football Academy vs Sechü FC @ 11:30 AM
2. New Market FC vs Ignite FC @ 1:30 PM

Teach Tool amshiba nung Nagaland...

Teach Tool nungi ngutetba ajanga Teacher Professional Development (TPD) yimyatem tashi itshitsü. State tesem ajungalen government school nung shisaliok tajungba kumdaktsüsü, sayuba yimyatem, capacity building aser learning environment tajungba kumdaktsüsü mechi NEP-The Lighthouse (NECTAR) kübok Teach Tool ya ka lir. Samagra Shiksha nung

Educational Block Resource Centres (EBRCs) balala den semloka aliba Trainers of Teachers 37 temsüa kumogo aser kulizüng agütsüogo. Ano Nagaland Core team nungi ketdangsür asem (DoSE aser SCERT nungi ketdangsürtem) aser NECTAR team nungi asem temsüa kumogo aser kulizüng agütsüogo. September 22, 2023 nü iba training tembangba sentong nung jembidang, Commissioner and

Secretary, School Education and SCERT, Kevileno Angami-i training agirtem nem tenüngsang agütsü aser iba training nung angazükba tajungtiba nung amshitsü ayongzükba liasü. Iba sentong nung Principal Director, DoSE aser Project Director, NECTAR nungia training agirtem den tajungshi o jembia liasü. Iba master trainers (ToTs) training ya September 23 nü tembangtsü.

Darogapathar nung... (Tapak 2 nungi...)

Naga lima nung dangar tashitemet nung toktepdang asen Ao lima nungbo Jungliyimti nungi tambo dang toktepa aruba tanü tashi tokteper, saka iba putuji süyio. Aor yimya ajak tajung ta masü, shitsü lepsetdang, mersü lepsetdang, pongzü lepsetdang tambo tekolak agi saka shingo tepsetdangbo tanubosang nem tekolakji agütsü, saka tanübo item yimya du masü ajak tajungba nung alitsü meranger. School nunga akhidangbo 'good', 'very good' ta amshia aru, saka tanü-asungbo 'excellent' angutsü meranger aser aser shirnoki 'excellent' nguteter temi dang litettsü. Jungliyimti otsü dang jembiba ajanga dangar memeneptsü, anungji dangar koloni aor aji meteta jajatsüla, ta paise ayongzükba liasü.

Longkumer-i sarasadem, pela agizükba o Jenangsanger Aola, Temsüzenba Longkumer Tatar ajanga jembia aser kisür luden osang Bendang Longkumer-i agütsü.

Maneni Nungsangmeren Jamir Tatar ajanga rajem o jembia aser Alemtoshi Imsong Tatar ajanga melepozüng o jembia liasü.

Sentong nung menden Imti Imsong liasü aser sentong tembanga teloki sarasademba sülen lokti chiyongba mapang agia liasü.

Iba ki ya 2017 nungi yanglu tenzük aser kija aser telok balala nungi tenla bendenba sen crore ka ser lakh 15 dak tema liasü aser ki ya sen crore ka ser lakh 34 dak tema indoka yanglu. Iba kikumong tasazük 9,792 sqft. lir. Iba ki nung floor ana lir, aser floor shia kibong pezü-zü alitsüsa yanglua lir.

Putu menden rongsen lenmang maliba mechi iba ki ya yanglutsü lemtet, ta iba ki yangluba committee nung züngsem Imti Imsong-i ashi.

Ungma yimdam yimlang aser yimpang lir aser yimlang dang Jenangsanger ta ajar, ta paise ashi.

Iba sentong nung Speaker, Nagaland Legislative Assembly, Sharingain Longkumer aser Ungma Senso Telungjem Dimapur nungi tepela o jembia liasü.

Ki meshiteta Rev. Manen Longkumer-i sarasadem, sentong tenzük I. Supong

Uttar Pradesh nung police-i... (Tapak 5 nungi...)

Pa apuba anogo nungi police trok den Hindu yimsü alia amanger nisung 12 den osangbenertem densema arua parnok dang asüngdangya. Pastor leniba nung tekülem sentong tagidak mapang nung parnok arua tekülem sentong nung adenertem dang asüngdangyaa liasü.

Amongnü shia pastor leniba nung züngsem 50-60 shi tekülem sentong agir.

Pastor-i, "Kü nem sarasademdaktsüsü atema nisung 300 dak tema kü dangi aruogo aser Tsüngremi sarasadem langzüa parnok ajak taneptsü nguogo," ta ashi.

Khristan lenir kari yariba ajanga August 7 nü Pastor Rawat bail nung chiokogo aser tang par kibong mejangjaba tesem kati ogo.

Timtem adokdaktsüsü meranger... (Tapak 7 nungi...)

British Columbia nung June 18 nü Khalistani extremist Hardeep Singh Nijjar tepsetba nung India shilem alitsü akok ta hopta tetenzüklen Trudeau-i tai tongloksüba sülen India aser Canada tsüingta tensa mejungi akum. 2020 küm India-i Nijjar ya kiralongrar ka lir ta sangdong.

ayongzük.

September 10 nü New Delhi nung G20 senden amenba mapang iba indang Ato Kilonser Narendra Modi den indang-indanga aser temolung sapoka jembio, ta pai ashi.

Ano tasüngdangba ka langzüdang, Hombarnep House of Commons nung item taitüsü lemsateptsü telemteba ya züpa-züpa agiba masü," ta Trudeau-i langzü.

Brehostibarnü India-i Canada dang par li nungi India anema inyaksangshir aser kiralongrar anema nokdaktsü asüngdanga liasü aser Canada nunger indang visa services anenja linük ana tsüingta Nijjar tepsetba mechi tesendaktep tamajungtiba jenjangi ai.

India-i Canada dang linük nung diplomatic staff ajema akumtsü ashi. India nung aliba Canadian diplomatic staff temya Canada nung India nunger diplomatic staff aliba dang nungi kanga agi timba lir.

India-i iba tai tongloksüba magizük aser iba ken o dak sendakba nung Ottawa-i Indian ketdangsür meindokba mechi India-ia Canada diplomat ka meindoka liasü.

"Ni Hombar nikongdang ashiba nenshia ashir, asenoki süoki ia reprangtsü nüngdaka lir..." ta Trudeau-i ashi.

"Canada ali nung Canada nunger ka tepsetba nung India sorkar agent tem dena lir ta amangtsüsa kuli tejangja lir. Onok justice system tajung lir aser inyakyim nunga tashi tait. Iba ken o nung ochi ngutettsü asoshi India sorkar dang onok den külemi inyaktüsü

BILEMDANGANG
"Takok dang nungibo tamakok nungi timba angazük." "